

- सेना दिवस रे मौके आज जयपुर रा एस.एम.एस. स्टेडियम मांय शौर्य संध्या राख्खी ज्यी-रक्षामंत्री राजनाथ सिंह ई कार्यक्रम मांय मौजूद।
- सेना दिवस परेड मांय फौज रा नुवा जमाना रा बूता, लड़ाई री नुवी तकनीकां अर देशी मिसाइलां रो दरसाव करी ज्यो।
- प्रधानमंत्री नरेन्द्र मोदी कह्यो-सरकार बिना दुभांत जन कल्याण री भावना सागे काम कर रही है।
- मुख्यमंत्री भजनलाल शर्मा आज जयपुर लिटरेचर फेस्टिवल रो उद्घाटन कीनो-कह्यो-राजस्थान री धरा संस्कृति ने आगे बधावण वाळी संवाहक।

000

78 वां सेना दिवस रे मौके आज जयपुर मांय शानदार परेड राख्खी ज्यी। जगतपुरा रा महल रोड माथे राख्खी ज्यी परेड मांय भारत री फौज री बहादुरी अर नुवा जमाना रो फौजी बूतो निजर आयो। ओ पहलो मौको है जद सेना परेड फौजी छावनी रे बाहर जनता बीचे राख्खी ज्यी। परेड सरू व्हेवण ऊँ पैली सेना प्रमुख जनरल उपेंद्र द्विवेदी देश री हिफाजत सारू जन कुर्बान कर देवण वाळा वीर जवानां रा पिरवार वाळां ने सेना मेडल दे र नवाजी ज्यो। परेड रे दौरान जवानां री अनुशासित टुकड़ियां सलामी मंच सामी ऊँ निकळता थकां वीरता अर पेशेवर बूता रो दरसाव कीनो। कार्यक्रम मांय फौज रा लड़ाई रा नुवा जमाना रा बूता रो बेहतरीन दरसाव करी ज्यो। परेड ने निरखण सारू राज्यपाल हरिभाऊ बागडे, मुख्यमंत्री भजन लाल शर्मा, राज्य मंत्रिमंडल रा सदस्य, फौज रा आला अहलकार अर मोटी तादाद मांय जनता मौजूद रही। म्हाणा खबरनवीस बतायो के परेड मांय खुद रे पाण ऊबा भारत री झलक निजर आयी।

परेड पाछे खबरनवीसां सागे बातचीत करता थकां सेना प्रमुख जनरल उपेंद्र द्विवेदी कह्यो के भारत री फौज मौजूदा चुनौतियां सागे आवता बगत री जरूरतां रा आधार ऊँ तैयारी कर रही है। जनरल द्विवेदी कह्यो के इण ने ध्यान राखता थकां केई नुवी इकाइयां बणायी ज्यी है, ज्यां री झलक परेड मांय देखण ने मिली। वे कह्यो के खुद रे पाण ऊबो व्हेवणो लक्ष्य नी है बल्कि रणनीतिक जरूरत बण ग्यो है।

सेना दिवस रे मौके आज सिंज्यां जयपुर रा सवाई मानसिंह स्टेडियम मांय शौर्य संध्या राख्खी ज्यी है, जिण मांय रक्षामंत्री राजनाथ सिंह ई शामिल व्हे रह्या है। कार्यक्रम मांय मुख्यमंत्री भजन लाल शर्मा कह्यो के राजस्थान री वीर धरा मातृभूमि री हिफाजत सारू हमेशा आगे रही है। श्री शर्मा कह्यो के प्रदेश रा हर गांव अर कस्बा रा नौजवानां मांय फौज मांय शामिल व्हे र देश री सेवा करण रो जज्बो अर सपनो निजर आवे है। मुख्यमंत्री कह्यो के राज्य सरकारी फौजियां अर वां रा पिरवार वाळां रा भला सारू लगातार काम कर रही है। इण ऊँ पैली रक्षा मंत्री राजनाथ सिंह जयपुर रा फौजी टेशन मांय सेना रा जवानां सागे बातचीत कीनी। ई मौके वे कह्यो के देश री सरहद री हिफाजत मांय फौजी जवानां रो खास काम है अर पूरो देश फौज सागे मजबूती ऊँ ऊबो है।

प्रधानमंत्री नरेन्द्र मोदी कह्यो है के देश मांय लोकतंत्र रो मतलब आखिरी छोर ताई सेवाएं पूगावणो है अर सरकार बिना दुभांत हर एक जणा भला सारू काम कर रही है। श्री मोदी आज नई दिल्ली मांय राष्ट्रमंडल देशां री संसद रा अध्यक्षं अर पीठासीन अधिकारियां रा सम्मेलन मांय बोल रह्या हा। प्रधानमंत्री कह्यो के देश विविधता ने ताकत बणायी है। वे कह्यो के संसदीय कार्य प्रणाली अर लोकतांत्रिक प्रक्रियावां रा बारा मांय जाग जगावणो जरूरी है।

ई मौके लोकसभा अध्यक्ष ओम बिरला कह्यो के भारत री संसद रा 70 साल ऊँ बत्ता बगत रा काम-काज मांय जनता रो ध्यान राखण वाळी नीतियां अर भलो करण वाळा कानून बणावण रे जरिये लोकतंत्र ने मजबूत बणायी ज्यो है।

राज्यसभा रा उपसभापति हरिवंश कह्यो के ऐड़ा मंच अनुभव सागे काम करण रा बेहतरीन तरीका एक-दूजा ने बतावण अर लोकतांत्रिक संस्थानां सामी आवण वाळी चुनौतियां रा बारा मांय मिल र विचार करण रो खास मौको देवे है। विधानसभा अध्यक्ष वासुदेव देवनानी ई सम्मेलन मांय शामिल व्ह्या। वे कह्यो के राष्ट्रमंडल देशां रा संसद अध्यक्ष 17 जनवरी ने जयपुर रो दौरा करेला

000

राष्ट्रपति द्रौपदी मुर्मू रो काल एक दिन रा दौरा सारू जयपुर पधारण रो कार्यक्रम है। वे काल दोपहरां जयपुर हवाई अड्डा ऊँ लोक भवन जावेला। राष्ट्रपति सचिवालय ऊँ मिली जाणकारी रे मुजब श्रीमती मुर्मू सिंज्यां री पोर रामानंद मिशन कानी ऊँ राख्या जावण वाळा धार्मिक कार्यक्रम मांय शामिल व्हेला।

000

मुख्यमंत्री भजनलाल शर्मा कह्यो है के राजस्थान री धरती सदियां ऊँ ज्ञान, कला अर संस्कृति ने आगे बधावण वाळी रही है। वे आज जयपुर मांय सरू व्ह्या जयपुर लिटरेचर फेस्टिवल रा उद्घाटन सत्र मांय बोल रह्या है। मुख्यमंत्री साहित्य ने जिन्दगी रो जरूरी हिस्सो बणावण री अपील करता थकां कह्यो के पोथियां पीढ़ियां ताई ज्ञान री रोशनी करे है। वे मीरा बाई री भक्ति अर कन्हैयालाल सेठिया सरीखा महान साहित्यकारां ने याद करता थकां कह्यो के साहित्य हर दौर मांय देश बणावण रो काम कीनो है।

-----

ई मौके उपमुख्यमंत्री दिया कुमारी अर देश-परदेश रा नामी लेखक अर साहित्यकार मौजूद रह्या।

000

सवाईमाधोपुर शहर रा 263वां स्थापना दिवस रे मौके 17 ऊँ 19 जनवरी ताई जिला मुख्यालय माथे खास कार्यक्रम राख्या जावेला। ई दौरान बाघ महोत्सव अर 18-19 जनवरी ने अमरूद महोत्सव माथे सगळां रो खास ध्यान व्हेला। कृषि मंत्री डॉक्टर किरोड़ी लाल मीणा बतायो के लोकसभा अध्यक्ष ओम बिरला रो अमरूद महोत्सव रो उद्घाटन करण रो कार्यक्रम है। कृषि मंत्री बतायो के ई महोत्सव मांय खेती-बाड़ी री नुवी तकनीकां रो दरसाव करण सागे किसानां सारू न्यारी-न्यारी होडां ई राखी जावेला।

000

भारतीय जनता पार्टी रा प्रदेश कार्यालय मांय काल 'विकसित भारत गारंटी रोजगार और आजीविका मिशन' यानी वीबी-जी राम जी रा बारा मांय कार्यशाला राखी जावेला। कार्यशाला मांय मुख्यमंत्री भजनलाल शर्मा, भाजपा रा प्रदेश अध्यक्ष मदन राठौड़ अर राष्ट्रीय महामंत्री अरुण सिंह खास तौर ऊँ शामिल व्हेला।

000

राष्ट्रीय खाद्य सुरक्षा अर पोषण मिशन रा तहत आज भरतपुर मांय राज्य स्तर री श्री अन्न कार्यशाला राखी ज्यी। इण मांय भरतपुर, डीग, अलवर, धौलपुर, करौली, सवाईमाधोपुर अर दौसा जिलां रा 500 ऊँ बत्ता किसानां अर एफ.पी.ओ. सागे स्वयं सहायता समूह रा सदस्य शामिल व्ह्यो।

कार्यशाला मांय ज्वार, बाजरा, रागी, कुटकी, फिगर मिलेट्स, कंगनी, चैना, कोंदो, सावा सरीखी साखां अर वां ऊँ बणाया जावण वाळा उत्पादां री जाणकारी दीरीजी। ई मौके गृह राज्य मंत्री जवाहर सिंह बेढम कह्यो के श्रीअन्न ने पूरी दुनिया मान्यो है अर वां रा बेहतर नतीजा सामी आया है।

000